

FORMULIER OM DIE DOOP AAN DIE KINDERS VAN GELOWIGES TE BEDIEN

Geliefdes in die Here Jesus Christus

Die leer oor die doop word in hierdie drie hoofpunte
saamgevat:

- | | |
|----------------|--|
| Sonde | Ten eerste: Ons en ons kinders word in sonde ontvang en gebore. Daarom is ons onder die toorn van God en kan ons nie in sy ryk kom nie, tensy ons weer gebore word. Dit word ons geleer deur die indompeling in en besprenkeling met die water, wat die onreinheid van ons siele aandui. So word ons vermaan om 'n mishae in onself te hê, ons voor God te verootmoedig en ons reiniging en saligheid buite onself te soek. |
| Verlossing | <p>Ten tweede: Die doop betuig en verseël aan ons die afwassing van die sondes deur Jesus Christus. Daarom word ons gedoop in die Naam van die Vader en die Seun en die Heilige Gees.</p> <p>As ons in die Naam van die Vader gedoop word, betuig en verseël die Vader aan ons dat Hy 'n ewige genadeverbond met ons sluit en dat Hy ons tot sy kinders en erfgename aanneem. Daarom wil Hy ons met alle goeie dinge versorg en alle kwaad van ons afweer of tot ons beswil laat dien.</p> <p>As ons in die Naam van die Seun gedoop word, verseël die Seun aan ons dat Hy met sy bloed al ons sondes afwas en dat Hy ons in die gemeenskap van sy dood en van sy opstanding inlyf. So word ons van ons sondes verlos en voor God regverdig gereken.</p> <p>Net so ook: As ons in die Naam van die Heilige Gees gedoop word, verseker die Heilige Gees ons deur hierdie sakrament dat Hy in ons wil woon en dat Hy ons tot lidmate van Christus wil heilig. Dit doen Hy deur tot ons eie te maak wat ons in Christus het, naamlik die afwassing van ons sondes en die daaglikse vernuwning van ons lewe, totdat ons uiteindelik volmaak sal wees as ons in die gemeente van die uitverkorenes in die ewige lewe gestel sal word.</p> |
| Dankbaarheid | Ten derde: Alle verbonde het twee kante. So word ons in die doop deur God vermaan en verplig tot 'n nuwe gehoorsaamheid. Ons moet naamlik hierdie enige God, Vader, Seun en Heilige Gees, aanhang, vertrou en liefhê met ons hele hart, met ons hele siel, met ons hele verstand en met al ons kragte. Ons moet ook die wêreld versaak, ons ou natuur kruisig en godvrugtig lewe. As ons soms uit swakheid in sondes val, moet ons nie aan die genade van God twyfel of in sondes bly lê nie: die doop is immers 'n seël en onbetwisbare getuienis dat ons 'n ewige verbond met God het. |
| Die kinderdoop | Alhoewel ons kinders hierdie dinge nie verstaan nie, is dit nie 'n rede om hulle van die doop uit te sluit nie, want sonder dat hulle dit weet, het hulle in Adam deel aan die verdoemenis, en sonder dat hulle dit weet, word hulle ook weer in Christus in genade aangeneem. God spreek dit baie duidelik uit |

Gen. 17:7 as Hy aan Abraham, die vader van al die gelowiges, en daarom ook aan ons en ons kinders, sê: Ek sal my verbond oprig tussen My en jou en jou nageslag nã om jou in hulle geslagte as 'n ewige verbond, om vir jou 'n God te wees en vir jou nageslag ná jou. Daarvan getuig Petrus ook: Want die belofte kom julle toe en julle kinders en almal wat daar ver is, dié wat die Here ons God na Hom toe sal roep.

Mark. 10: 16 Daarom het God voorheen beveel om die kinders te besny, want dit was toe die seël van die verbond en van die geregtigheid van die geloof. So het Christus ook sy arms om hulle geslaan, sy hande op hulle gelê en hulle geseën.

Kol. 2: 11-12 Omdat die doop in die plek van die besnydenis gekom het, moet die kinders as erfgename van die ryk van God en van sy verbond gedoop word, en die ouers is verplig om hulle kinders, namate hulle groter word, hieroor breedvoeriger te onderrig.

Om hierdie instelling van God tot sy eer, tot ons troos en tot opbouing van die gemeente uit te voer, laat ons saam bid:

Gebed

1 Petr. 3:20, 21
1 Kor. 10:21

Almagtige, ewige God, U het in u streng oordeel die ongelowige en onboetvaardige wêreld met die sondvloed gestraf maar die gelowige Noag met sy gesin in groot barmhartigheid gered en bewaar. U het die verharde farao en al sy manne in die Rooisee laat verdrink maar u volk Israel op droë grond daardeur laat trek. Hierin het U ons 'n heenwysing na die doop gegee.

Rom. 6:4

Daarom bid ons U om ook hierdie kind van U genadiglik aan te sien en hom deur u Heilige Gees in Jesus Christus, u Seun, in te lyf sodat hy deur die doop saam met Hom in die dood begrawe word en saam met Hom in 'n nuwe lewe opgewek word. Gee dat hy sy kruis blymoedig mag opneem, Christus daaglik volg en Hom aanhang met 'n opregte geloof, vaste hoop en vurige liefde, totdat hy eindelijk hierdie lewe - wat onvermydelik op die dood uitloop - om u ontwil getroos verlaat en die laaste dag sonder vrees voor die regterstoel van Christus, u Seun, verskyn.

Dit bid ons van U deur Hom, ons Here Jesus Christus, u Seun, wat met U en die Heilige Gees die een en enige God is en tot in ewigheid leef en regeer. Amen.

Die doopouers moet nou op die volgende vrae antWoord:

Vrae

Geliefdes in die Here Christus, u het gehoor dat die doop 'n instelling van God is om aan ons en ons kinders sy verbond te verseël. Daarom moet ons dit vir dié doel en nie uit gewoonte laat bedien nie.

Dat dit dan kan blyk dat u so gesind is, moet u op hierdie vrae ongeveer antwoord:

Ten eerste: Bely u dat ons kinders, al is hulle in sonde ontvang en gebore en daarom aan allerhande ellende, ja, aan die verdoemenis self onderworpe, tog in Christus geheilig is en daarom as lidmate behoort gedoop te wees.

Ten tweede: Bely u dat die leer van die Ou en Nuwe Testament, wat in die Artikels van die Christelike geloof saamgevat is en in die Christelike kerk hier geleer word, die ware en volkome leer van die saligheid is?

Ten derde: Beloof u en is dit u voorneme om hierdie kind, van wie u vader en/of moeder is, as hy tot sy verstand gekom het, in hierdie leer na u vermoë te onderrig of te laat onderrig?

N, wat is hierop u antwoord?

Antwoord: Ja.

Doop

As die bedienaar van die Woord die doop bedien, sê hy:

N, ek doop u in die Naam van die Vader en die Seun en die Heilige Gees.

Dankgebed

Almagtige, barmhartige God en Vader ons dank en loof U dat U ons en ons kinders deur die bloed van u geliefde Seun, Jesus Christus, al ons sondes vergewe het; dat U ons deur u Heilige Gees tot lidmate van u eniggebore Seun en daardeur tot u kinders aangeneem het en dat U dit aan ons met die heilige doop beseël en bekrachtig.

Ons bid U ook deur Hom, u geliefde Seun, dat U hierdie kind van U altyd met u Heilige Gees wil regeer, sodat hy Christelik en godvrugtig opgevoed mag word. Laat hy in die Here Jesus Christus groei en toeneem, sodat hy u vaderlike goedheid en barm hartigheid, wat U aan hom en ons almal bewys het, mag leer ken. Gee dat hy in alle geregtigheid onder ons enigste Leraar, Koning en Hoëpriester sal lewe en moedig teen die sonde, die duiwel en sy hele ryk sal stry en oorwin en dat hy U en u Seun, Jesus Christus, en ook die Heilige Gees, die enige en waaragtige God, ewig sal loof en prys. Amen.